

鍾祥縣志

熊道琛署

鍾祥縣志

熊道琛署

中華民國二十六年
二月刊於首都



鍾祥縣志卷之二十三

先民傳五

張楹字書存邑廩生性孝友幼遭父母喪哀痛盡禮以勤儉教家人於宗族有推解之誼家居授徒傳其學者皆成名作字摹率更體復進而學右軍人得墨跡珍爲楷法子應翔應偉

應翔字雲騫性孝友少嗜學工書法道光丁酉拔貢筮仕山東歷署館陶蘭山等縣篆所至多善政遷德州知州尤著循聲時臨邑武生陳某故大俠遠近數萬人聽指使人遂嘖嘖謂蓄異志巡撫某命應翔查辦應翔單騎往諭之陳感泣願爲國效力其後卒爲善士應翔以河工晉知府銜補授臨清直隸州知州卒於官生平篤於故舊俸入嘗分贈宗族鄉黨尤有知人鑒官蘭山時有青陀司巡檢程繩武者廉得其材特登薦牘繩武後仕至登昌府擒權閹安得海有功論者謂應翔能以人事君云應偉字雲明官河南知縣

涂相天性純篤兄弟二相居次析產後別構宅三棟從新整理費數千金兄以子多室隘意欲得相宅而未便明言父母知之亦躊躇未發相婦李穎堂上意婉商於相相曰吾宅即兄宅也同稟雙親請命兄移居并出印契授之相好學問尤邃於易於古今注疏參互攷證以理爲主而於象數之學亦篤信不疑著有說易管見子四兆麟兆書兆穉均知名

兆麟字椿田邑增生與弟兆書同歲游泮時有雙壁之稱性孝友以親老請代主家政遂輟科舉業躬自摒擋家日以起早歲與張應翔太守雲鵞相友善應翔牧德州走書幣迎之客山東年餘行程所經往往託諸歌詠著有南星詩文集

兆書字玉田廩貢生性純厚好讀書家事任伯兄經理專以授徒爲業嘗選蘄水訓導以親老未就道咸間歲科試獲售者兆書弟子十常居八九登春秋榜者亦相繼而起卒以精血過耗未及中壽而歿著有靜修齋文集四種古今體詩若干卷四書述義三十卷子士青

兆穉字信田邑庠生才具開敏精算術地理於醫學尤有心得凡地方興革事宜守令多延請商酌與龔嶽曉峯同負桑梓重望有子七人長士玉次炳南均庠生士玉子文蔚增生

士青字蓮舫兆書次子附貢生年十三居父喪哀毀若成人及冠橐筆走豫兗燕冀間諸當道延爲上客後應臨清張應翔州牧之聘張命子師事之以功歷保至知縣著有映雪吾廬詩文集若干卷子伊蔚

伊蔚字嗣伯歲貢生父士青早卒事母竭誠致敬嘗刲臂以療母疾甫冠母歿哭盡哀幾失明族黨以純孝稱之少讀宋儒書尺寸必繩禮法遇尊長輒肅立不苟言笑與儕輩處亦姁姁循循深自謙抑然喜酒嗜飲飲輒醉醉輒與人忤醒後大悔痛自責越宿或親謁其人謝罪久與處者笑其迂而服其誠僉以長厚相稱授徒里門從游者甚衆鄉人以爲克繩祖武云伊蔚留心鄉邦文獻鼎革後嘗就孝義節貞之行分門撰述顏曰芸窗草創表微發潛厥功甚鉅著有詩文集若干卷

子鍾鼎能繼其傳求學會城以渡江溺死鄉人惜之

韓賜麟字笛樓少讀書攻苦爲文章有名道光乙酉拔貢廷試一等以知縣分發甘肅時回疆用兵賜麟綜理餉需居幕府草檄治文書身兼數人事無廢者補徽縣別弊鋤奸數月稱治縣西積寇毛大安馬五等聚黨數百人爲刼掠以方略擒斬之增置書院義田禁民間露葬修城隍通水利所建設皆爲民賴調署敦煌縣縣自雍正初遷內地民出關墾屯田其後生齒日繁物力不給重以水旱頻仍供億軍餉民鮮蓋藏恒貸官糧爲籽種歲歉里胥追呼至質田宅鬻妻子以償轉相逃匿賜麟請以十年分徵民獲蘇甦署寧州州賦甲一省民力不支賠地丁銀六千兩有奇民懷其賜爲立祠狄梁公廟左任循化同知墾荒八百餘畝修八工水利築三渠立保甲民大悅服西寧令某因事激變檄往代理縣事兼攝西寧府事治如前以目疾告歸卒於家子潤

枚字次樓賜麟弟歲貢生隨賜麟官甘肅有年工文詞喜吟詠所著詩名西游草

以古體爲最子漢官寶山知縣

潤字澤生官宜春知縣掛吏議回里杜門借詩酒自娛與劉漢閣齏官樹聲常蔭南拔萃開榕相倡和時有廣東逐客黃夏航被議謫郢負詩才潤約劉常結社聯吟不輟其詩多爲當時所傳誦子國斌

國斌字子憲性敏學瞻能紹祖若父之傳弱冠蜚聲庠序間乙酉應拔萃試被黜頗懊喪嗣肄業經心書院與穀城劉元弼伯良相得爲李篁仙院長所激賞李嘗稱劉生奇才韓生清才皆異時翰苑人物劉旋聯捷成進士國斌迄無遇益抑鬱不自聊時託詩歌以抒其懣懣之氣洎光緒丁酉始以拔萃貢成均而廷試又不獲選識者惜之然國斌遇屯而名益著遠近慕丰采者爭以文翰相求國斌亦相與安之光緒丁未始以直州判分發江西鼎革初考取知事任江西永豐縣有善政以疾歸卒於家

劉世泰字治堂恩貢生性孝友事繼母尹宋氏氏皆得歡心先後經父母喪均竭力

舉之其後兄弟析居世泰體父心悉以沃產歸幼弟植品績學爲文以史漢爲宗著述多散佚其傳世者有黃時榮家傳子楹榮

楹字軒甫廩貢生國子監肄業即補訓導博學工文名噪一時

榮字友蘭歲貢生家居課徒造就甚宏秋闈屢膺房薦卒艱一第子四鳳翔鳳翔最知名

楫字濟川世泰從子歲貢生家貧克勵清操以教讀爲生從游者甚衆晚主講文昌書院士林奉爲楷模子鳳藻能傳其學鳳藻承弟榕祧

鳳翔字仲翔號芷田同治丁卯優貢考取八旗官學教習未蒞學卒於京師鳳翔天姿英敏博綜典籍與弟鳳翔齊名鄉人有雙壁之稱甫貢春官遽死客邸聞者無不扼腕云子克家

鳳翔字叔翔號雲程歲貢生讀書善鈎稽周覽數遍即能挈其綱領娓娓談不倦以故博學彊識同時儕輩無不歛手推服其制藝嘗爲南皮張文襄所激賞然屢

困棘闈迄不獲售遂厭棄科舉業究心掌故及當世之務光緒時滬上初設申報鳳翔獨購閱邑人有留心時事者往往就鳳翔探詢晚歲尤壹志醫書然未嘗輕爲人示方也

克家字用甫少承世父敦紀嗣及本生父鳳翔卒京師克家鮮兄弟遂以孤子兼祧兩節母同撫育之天姿聰穎頗不羈從叔父鳳翔受學每課藝下筆數千言叔父但芟薙其尤冗雜者餘悉加以濃圈克家用是益自負博涉羣書遇文題有可擲入者鋪張其詞有滔滔不竭之勢如是者數年叔父始以法度繩之又久之克家文字始一軌于正制藝力宗天崇古文辭雖縱筆所之浩博無涯而矩矱森然雅與大蘇相近書法摹平原筆力蒼勁頗得其真光緒癸卯登鄉薦以藩庫大使分發河南時仕途燕雜政以賄成克家不能隨習俗轉移居數年迄無所遇乃應廣西高等學堂之聘鼎革後被選省議會議員國體初更黨派紛起議會尤爲交聞之場克家性慙直動以古道自處諸議員咸以不達時務譏之克家遂離議席

退隱邑之東山以課徒自活東山故多盜克家時發正論中羣盜忌一日盜齧集
克家方諭以禍福而盜已實彈洞其胸矣鄉人哀之著有二半山房詩文集子二
傳學傳薪傳薪畢業天津工業大學

游桂林道光己亥武舉人庚子進士選授江南都司歷署參鎮兼護提督軍門事務
坤垣道光庚子武舉人丁未進士選授廣西游擊歷升協鎮軍功記名總兵賞戴
花翎

道南貢生幼失怙事母柳以孝聞大父年屆八旬起居須人扶持道南左右服勤
朝夕無閒鄉里稱之子本仁光祿寺署正

維翰庠生兩淮即補鹽大使本懷歷署東安安鄉知縣鳳墀廣西即補知州大奎
字星五歲貢生力學工文選德安訓導

周春陽道光乙酉拔貢廷試一等以知縣分發山西歷署襄陵安邑等縣有惠政壬
辰調充鄉試受卷官謄錄所不戒于火失二十餘卷春陽與司謄錄秦某爭任其

咎不以罪書者署臨汾時平反疑獄活二人咸豐三年擢江西南安府同知時粵匪圍河南懷慶大府以山西垣曲壤接仍令春陽守平陽郡城郡有鎮兵二千餘人春陽言知府某請更募兵千餘人益之籌守禦諸事畢具其後大府調鎮兵防省城民兵皆不習戰事及八月十日賊大至攻陷郡城春陽不屈死詔建專祠于平陽祀之

章映槐字庭三性嗜學從兄廩生某受業攻苦不輟道光丁酉副榜教授生徒終日不倦居平寡言笑慎交游其孝友出于至性尤爲人所難能云

綬榮字華甫映槐之裔宣統己酉拔貢民國初考取新疆知事歷任要缺有能聲嗣遇楊增新之變被害論者冤之

丁文智字也愚號意村父雲山有隱德文智道光辛巳舉順天鄉試天性孝友淡于仕宦家居課子弟咸成立尤好爲鄉黨造善事如建銅獅口闡其一也先是距麗陽驛四十里之樂鄉關山畝平衍沿壑下計田數千畝文智創意修闡其父雲山

以歲歉暫止越二年興工開築規模初就雲山與文智相繼逝世文智諸弟承父兄志次第告成遂爲一鄉之利事詳劉宜菴宗丞誼所撰碑記已錄入碑目矣

關棟字星階道光乙未副榜同治壬戌舉人性孝友初中副榜年甚少負笈游學名噪一時久之閉門授徒從游者自遠方至後先接踵所裁成者甚衆歲得修金治田宅與叔氏昆仲共之著有律賦十則若干卷從弟柄榕皆貢生柄擁皋比數十年門徒亦甚盛榕子兆福廩貢生兆蓉及柄子兆南皆諸生兆福尤知名

兆福字子謙善承家學早歲食廩廩學行爲鄉里矜式兄弟四極友愛叔弟兆蓉賴其教補諸生子慶龍留學東洋能嗣其傳

黃元吉字謙六原籍咸寧祖金嵩父河清乾隆間來遷遂爲鍾祥人元吉工文章早歲補諸生食廩廩性孝友篤內行事繼母能承歡心撫弟元善成立用科名致通顯其子孫因以詩書世其家爲邑望族皆元吉有以啟之也

元善字讓卿咸豐己未進士授戶部主事轉御史簡放貴州糧儲道署布政使官

諫垣時章疏屢上其論東三省曰俄羅斯窺伺東邊久矣倭人新起欲取高麗以圖遼東二虎鬬於中原三省人民之肉其足食乎其後所言皆驗糧道任內或請丈糧升科力言不可有糧署題壁記略云黔瘠地也漢苗雜處號稱難治我朝沿明舊制設立行省二百餘年代有名臣茂績垂光志乘兵興而後今昔殊觀某自癸未督糧是邦甫入境見邑有流亡地皆磽确爲惻然者久之與同僚謀所以富庶斯民者迄未得一善策今中丞潘公孳孳求治亦以今日黔事無急于患寡貧者集同官條議章程次第敷布復檄在省府廳州縣赴署面試命某與分校之役逐卷點勘類多通達治體確中時務之作惟間有議及苗田無賦宜將虛懸稞額撥歸八寨等處按畝攤派者此一說也亦有謂永從等縣嘉道間全行開墾宜丈量升科者此一說也且有欲將夫苗折價彌補正額并所勘官莊軍田題請改同科糧者此又一說也就其所陳不爲無見不知爲政之道在乎由舊方今瘡痍未復正當與民更始休養生息且維日不足乃欲改絃更張適以擾民者自擾况苗

民永遠免賦乾隆時已蒙特諭所以加惠荒服者足爲萬世法守哉某不敏受約束於下執事竊以爲有治法仍賴有治人守令爲親民之官有循良則政無廢弛今日策問諸員庶幾交相勸勉俾擇禮樂以鞠黔民且不僅化貧弱爲富庶矣記成潘梓入玉箴堂官課錄內以爲同官勸元善亦別中飽杜侵漁以裕庫欸歷官二十餘年黔省得以稱治以病告歸重宴鹿鳴卒年八十九著有儀禮纂要及詩文集

慈端字芷齡元善長子光緒丙子順天副榜癸巳舉人戶部郎中工書法元善致仕歸慈瑞侍養里門遂不復出

芝瑞字景余元善第五子少負異才補諸生肄業南學聲日起嗣赴日本習法政畢業鼎革初簡任甘肅高等檢察廳長芝瑞性開朗善談論博學多藝尤精星相家言長安貴人多樂就之然芝瑞特以是寄意而已

松齡字新甫元吉孫性淡泊恥以貴介自居隱市廛數十年時借書畫自娛善寫

竹蘭兼工墨梅世爭寶之子庭槐潔己自好能嗣其傳

錫齡字晉三元吉孫光緒乙酉拔貢由八旗官學教習以知縣分發陝西丁母艱回籍遂絕意仕進善詞章工吟詠楷法摹率更體酷肖尤爲一時所稱性豪爽與儕輩處劇飲清談有兩晉人風致家無恒產遇以急告者輒竭力助之鄉居時有勸其赴陝候補者答曰某具此傲骨於宦途絕不相宜毋寧藏吾拙也遂老於家龔嶽字曉峯廩貢生操行方正邑中有大工作縣令周而咨之非數請不往也人謂有澹台子羽之風子崇楠咸豐戊午副榜同治壬戌舉人毓桂毓福均歲貢生毓桂尤知名

毓桂字秋圃性孝友咸同間流寇充斥父母相繼歿毓桂授徒縣西中限漢水親族多依之亂平返故居四方學者爭願列入門牆成材甚衆子瑞琛奉先而瑞琛尤著

瑞琛字瑜璫少有雋才父毓桂督課嚴光緒戊子膺鄉薦時年方逾冠風度翩翩

見者多卜爲翰苑才乃屢困禮闈迄無所遇晚歲充重子師以終其身鄉人惜之

子漢雄

漢雄字偉人好武術宣統二年在湖北講武堂畢業辛亥秋編充炮隊隊長陽夏之役受傷重愈後補充連長北伐時頗著戰功二年歸里充東北鄉保衛團教練訓練團丁紀律嚴明匪不敢輕入其境地方安堵居民賴之十六七年孫匪發祥魏匪登瀛先後盤踞李家塢一帶漢雄隨營長某追勦時呂康普爲七區總指揮督戰前進各團團隊多觀望及康普死於陣衆益紛紛潰漢雄與杜大邦劉家中等奮力殺匪聲勢頗振無何匪衆雲湧漢雄與杜劉均中彈而亡

何文榮邑處士先世饒於財嘉道間迭遭水患家驟落兄弟六鮮有能自給者文榮念父母春秋高竭力侍奉并縮衣食以周兄弟之乏性慈祥遇急難事無風雨寒暑輒爲人奔走呼號必濟而後已嘗曰富而好施財有餘也財不逮而以力援之亦行方便之一法以故族黨家其惠者甚多子二成章元章